

四庫全書

集部

欽定四庫全書

五百家播芳大全文粹卷五上

宋 魏齊賢

葉芬同輯

謝表

郡守

謝除知江寧表

王介甫

稽違詔令經涉歲時先帝登遐既不獲奔馳道路陛下

即位又未嘗瞻望闕庭所憂後至之刑誅敢冀就加於  
官使雖知黽勉尚懼顛隳臣某

中謝

蓋聞因任以責羣

材原省以通衆志厥或抱能而可用則雖負疾而見容  
如臣者逮侍先朝叨官外制惓惓許國雖有愚衷沒沒  
隨人但尸榮祿銜哀去位嬰疹彌年望絕龍光分投冗  
散伏遇皇帝陛下紹膺尊極俯燭幽微延之以三節之  
嚴付之以十城之重比緣裡祀特有褒封申命曲加因  
郵并賜唯是土風之美素無犴獄之煩久寄託於丘墳

粗諳知其間里念雖閉閣殆弗廢於承流以北造朝或未妨於養疾矧恩勤之已迫且遜避之不容敢不少嘗體力之所任祇奉詔條而為治冀逃大戾仰稱殊私

謝除知鎮江表

汪彥章

起廢江湖甫三周於歲籥疏榮觀闕凡四易於州麾嗟治狀之無聞辱除書之屢至人微責重天大恩深伏念臣積冒寵榮浸成衰朽咸謂陳人之安用獨蒙聖主之不忘念嘗陪扈於初年未忍棄捐於中道適當盛際徧

歷名藩深行百粵之區遠薄三吳之境茲蓋伏遇皇帝  
陛下屬精求治虛已受言擇循良共理之人先惴惴無  
華之吏故如臣等亦在選中臣敢不共布詔條具宣德  
意坐攬淮山之形勝深究古今心如江水之朝宗靡忘  
夙夜

謝除知青州表

歐陽永叔

掌國五兵叨進中臺之秩宣風一面俾綏東土之人祇  
荷寵靈徒知隕越

中謝

伏念臣學非通敏才實空疎幸

逢千載之休明誤被三朝之獎擢久陪法從嘗預政機  
國恩未報而身已先衰世途可畏而命亦多蹇頓緣災  
疾遂決退休敢期上惻於皇慈未忍遽捐於舊物而復  
過推優渥以慰癯殘惟孤拙之無堪蹈艱虞而已甚世  
之所榮者臣之所懼人以為寵者臣以為憂是敢輒殫  
悃悞之誠累瀆高明之聽迫於危慮罔避煩辭而聖度  
并容寬其罪戾恩言屢降譬以丁寧知成命之難回勉  
覲顏而祇受而況全齊舊壤負海與區民俗富完而鑿

井耕田各安其業詔條寬大而奉法守職足以脩官內  
省庸虛奚勝忝幸此蓋伏遇皇帝陛下日新求治天覆  
推仁謂簪履雖玷於賤微尚堪收錄而犬馬苟豐於養  
猶可使令臣敢不策厲疲羸勤思夙夜庶期盡瘁少  
荅鴻私

謝除知忠州表

楊紱

圭窬屏跡已甘四壁之空玉陛疏恩遽賜一麾之寵雖  
元化不遺於微小而大明必照於幽深跼地莫遑戴天

有感

中謝

伏念臣性姿朴陋才識凡庸謬叨世賞之延

獲綴官聯之末窮邊極塞奔走一生沐雨櫛風辛勤萬  
狀固低回之已久必操守之弗渝但知潔已以奉公惟  
務愛民而來吏未嘗枉道將以徇人任勢利之見嗤豈  
君親之忍負自安有命皆付無心四宰縣封精力盡於  
此矣兩丞郡政艱難皆備嘗之身雖困而志益堅家雖  
貧而節愈厲方厄窮於蝸舍敢妄意於虎符矧此南賓  
控夫右蜀儼唐臣之前烈枕夔子之上流仰壽皇拔擢



之公逢聖主繼承之盛乃獨重寄以畀下愚茲蓋伏遇  
皇帝陛下祇服禹功欽承舜德本一道以相守爰奉詔  
謀資共理之惟良用安遠服致令疎賤誤玷選掄臣敢  
不恪守孤忠仰酬洪造豈止躡四賢之後無覩面顏庶  
幾舉三峽之間咸歌德意

謝除知青州表

蘇子由

守土無功曠官是懼成命旣出懇避無由

中謝

伏念臣

儒術空疎吏能淺薄早蒙選擢屢典方州中被寵光薦

歷臺省懷朴忠而不顧勵勤拙以自將然自遠去中朝  
落流外補首尾經八年之久左右無一人之容自分衰  
朽之餘無復甄收之望頃緣之使再至別京獲覩日月  
之光親聞金石之訓粗陳本末方慙尸素之才俯念孤  
平尚有驅策之意自違天闕曾未期年亟升侍從之班  
仍分旌鉞之寄鴻恩自至莫知其由此蓋伏遇皇帝陛  
下天地兼容陶鈞獨運識馮唐於郎省但取一言寘汲  
黯於淮陽未忘舊物恩深不報期銘骨於終身才拙自

知誓見危而一節銜命東往誠心內馳

謝除知遂寧府表

宇文价

高官厚祿無補論思重鎮隆名尚令叨竊特煥宸奎之

賜俾為畫綉之榮眷遇非常糜捐莫報臣

中謝

伏念臣

賦才謗薄為學空疎起自冷官濫陪朝著圓壇前導清

問下及於姓名選德對揚玉音有取於人物由茲親擢

疊冒恩除曾未數年徧登兩省內省空食之愧日懷負

乘之憂至於長戎部而侍經帷以儀曹而兼鹵簿惟蘇

軾還朝之日盡歷厥官而小臣去國之時并盡其職自知非據理合投閑載惟從欲之仁俾遂丐歸之志矧茲武位望重潛藩甲兵無總於五州節鎮素雄於方面昔三年學嘗分教於諸生今一星終復提封於千里風俗孰知其易治士民亦得以相安雖自為謀莫過於此茲蓋伏遇皇帝陛下勵精圖治虛已納言合四海以為家視羣臣而若子知臣未諳於民事第有空言察臣素短於吏能責其來效臣敢不祇奉丁寧之訓具宣寬大之恩

備數西清實近天威之咫尺究心職事敢忘聖語之褒  
嘉

謝除知亳州表

歐陽永叔

貳政非材雖獲奉身而退分符善地猶懷竊祿之慙祇  
荷寵靈唯知戰懼

中謝

伏念臣章句腐儒之學也豈足

經邦斗筭小器之量也寧堪大用而叨塵二府首尾八  
年荷三朝之誤知罄一心而盡瘁若乃樞機宜慎而見  
事輒言陷穽當前而橫身不避竊尋前載未有能全一

昨怨出仇家構為死禍造謗於下者初若含沙之射影  
但期陰以中人宣言於庭者遂肆鳴梟之惡音孰不聞  
而掩耳賴神聖之在上廓日月之至明悉究罔誣遂投讒賊  
再念臣性實甚愚而疎於接物事多輕信者蓋以至誠  
如彼匪人失於泛愛平居握手惟期道義之交延譽當  
朝常丐齒牙之論而未乾薦稱之墨已彎射羿之弓知  
士其難世必以臣為戒常情甚惡人將不食其餘而臣  
與遊既昧於擇賢在滿不思於將覆自貽禍害幾至顛

濟上煩睿聖之保全得完名節於終始湏懇還於重任  
尤深惻於皇慈雖避寵辭隆僅能去位而清資顯秩愈  
更叨榮莫逃僥倖之譏實負厚顏之覷茲蓋伏遇皇帝  
陛下乾坤大度堯舜至仁察臣自取於怨仇本由孤直  
憫臣力難於辨雪蓋迫衰殘既獲免於非辜仍曲從於  
私欲遂同萬物俾無失所之嗟未盡餘生敢忘必報之  
効

謝除右文殿脩撰知通州表

胡文定

六押分曹濫預西臺之末議一麾出守許頒東郡之寬  
條祈閑屢瀆於冕旒從欲漸依於丘壑俯慙羈陋仰戴  
睿慈

中謝

伏念臣初乏智能但懷忠信逢辰熙洽亦有

意於功名就任迴環乃自循於分義惜年光之冉冉感  
心事之營營倚嶠望雲視身猶愧臨流觀水閱世何求  
誤蒙特達之知亦預招延之列記螭坳之冊牘曾靡崇  
朝掌鳳閣之絲綸遽膺明命事君者必本於直道知己  
者難徇於私情矧居侍從之班敢廢論思之職所志雖



期於補報出言多失於迂愚尚沐恩私獲叨民社此蓋  
伏遇皇帝陛下德侔天大明並日中親賢否以同仁均  
顯微而必照欲求忠藎與掩疵瑕肆塵論撰之資更責  
循良之効臣敢不益思為善務在守身迹雖迫於孤危  
心豈分於中外海邦千里敢安魚稻之居魏闕九重徒  
結鼓鐘之戀

謝除知太平州表

洪邁

一麾出守方切兢危三命益恭弗容控避仰皇天之

造扣丹地以何言臣

中謝

伏惟陛下睿知有臨神武不

殺慕舜之孝見堯於牆德冠古今而獨尊仁並清寧而  
徧覆明見萬里將大混於車書子惠庶民更精求於岳  
牧臣家本儒素時無令名濫叨寵博之科說駕清華之  
地瀛山抱槩郎省握蘭在紹興之末年污記注於古史  
伏遇皇帝陛下龍飛應運鳳歷紀祥不遺細微兼取愚  
鈍遂以詞翰之職獲侍清晏之歡雖夙夜應仙許暫來  
於天上而塵志未斷旋即墮於人間一去十八年之中

三叨二十石之寄末繇金華郡還紬石室書從琳臺門  
館之遊勤廣厦細旃之誨真拜學士號名私人受九重  
知己之殊極三八承明之幸使與大議不專斯文而臣  
弱羽不足以當雄風蹇步不足以勝重任上恩惜於終  
棄左將寵其餘生李廣數竒徒羨侯於校尉汲黯妄發  
敢嘆薄於淮陽臣即以今月二十八日到任上訖伏以  
郡在江東昔稱道院地隣淮右今謂壯藩謹當宣布恩  
威奉行寬大求民之瘼問俗所宜緩帶輕裘雖未賢長城

於李勣清心省事敢不避正堂於蓋公庶幾固結本根  
少復報酹知遇

謝除知襄陽府表

吳 琚

四品綴班濫次西清之對十連謀帥誤分北顧之憂揆  
日臨民望風祗命臣中謝伏念臣才非適用生偶逢時星

使驅馳絲毫無補月卿超躡命薄奚堪荷壽皇四牡拊  
勞之恩姑使內朝而道籍值聖主六龍奮飛之會故慙  
從列以偷安詎謂鴻私付之劇任眷言峴首為今國藩

大將重兵之分屯長江平陸之衝要昔羊祜之名德唯  
能懷敵故能安邊如孔明之奇才不先謀人每先治己  
得人若此制閭不難昇以非宜受之實懼茲蓋伏遇皇  
帝陛下剛健中正文思聰明地闢天開聖人作而萬物  
覩風行雷厲元首起而百工熙至求疆場之臣尤重藩  
宣之寄顧如臣者早受眷知方聞命而即行擬控辭  
而不可威顏咫尺臨遣甚優訓誥溫純丁寧曲盡臣敢  
不博詢民隱者定戎昭齊其政不易其宜當布周南之

風化備其虞謹守其一務綏禹甸之山川

謝除知舒州表

趙彥丞

上蘄水之更書三周歲籥昇桐鄉之新組再剖州符祇

荷恩榮倍深兢惕臣

中謝

伏念臣才非適用識昧通方

少本淡於宦情老粗諳於世故徒以夙聯屬籍早列荐紳奔走期會之煩僅逃曠責推移日月之久卒乏異能頃繇贊郡之微勞濫受守邊之優寄不馳驛騎幸當兵寢之時兼領鐵官偶最錢流之課實惟地寶夫豈人謀

嘗因天陞之對揚親被玉音之褒拂初無推轂復使乘  
輻唯是同安政當准右考於方志舊為楚國之附庸驗  
彼民風尚有漢臣之遺愛豈茲謗薄可稱拊摩此蓋伏  
遇皇帝陛下器使群工鑒觀萬務方當循名責實之際  
尤重承流宣化之臣謂臣已試牧民

以下闕

謝除知泉州表

鄭 丙

宣力藩條初無善狀陞華書殿忽奉優恩衰朽增榮凌  
兢罔措臣

中謝

伏以同人敬老每問政以乞言漢世選

侯或賜金而增秩必有功而有德斯懋賞以懋官苟非  
其人曷稱是選伏念臣稟資甚下任職叨逾高宗更化  
之初糾繩學省壽皇臨御之始分察憲臺累更使節之  
華徧歷中都之選掖垣鎖闥初無封駁之能宗伯天官  
何有論思之益紬書東觀進讀邇英賜卮酒於使朝賓  
宸奎於私室一從外補三易价藩松栢後凋寧改霜雪  
之操桑榆已晚尚謀田里之歸慶真主之龍飛偕輿人  
而獸舞念昔陪於王邸幸早識於天顏敢意記存首加



獎勵顧聖主之英俊布滿周行豈奎畫之褒題乃從隗  
始年齒雖高而德不稱踐揚滋久而効未彰靜惟將耄  
之資曷副維新之化茲蓋伏遇皇帝陛下履位中正憲  
天聰明日月照高衢夙稟生知之德雷風鼓萬物孰知  
帝力之神方茲初政之地講求尚齒之制捐明光之邃  
直昇孤遠之老臣雖故事由常伯而出者間有此除在  
公議則人品不堪者豈宜冒處臣敢不益堅素守力企  
前脩賞一人勸千萬人唯知砥節以勵行行百里半九

十里靡敢倒行而逆施靡竭涓埃仰酌覆燾

謝到任表

留守

留守到任謝表

歐陽永叔

守宮籓之謹嚴敢忘夙夜布政條之纖悉上副愛勤寄

託非堪兢榮並集

中謝

伏念臣賦才菲薄稟數竒屯毀

譽交興名常過實寵榮逾分動輒招尤念報效之未伸

敢不竭忠而盡瘁因風波之可畏則思遠去以深藏速

此六年外更三守學偷安而杜口負素志以媿心朽質  
易衰已凋零於齒髮良時難得尚希慕於功名豈謂皇  
慈未捐舊物擢從支郡委以名都惟此別京舊當孔道  
簿領少勤於職事厨傳取悅於路人苟循俗吏之所為  
雖能免過非有古人之大節未足報君

留守到任謝上表

蘇子由

越從散地擢守留都仰戴恩光惟知慚懼

中謝

伏念臣

早蒙器使屢試煩難任事多憂積衰成病乞身閑冷但

求安養於餘生絕意功名不復干求於當世豈謂聖恩  
未棄見收桑榆枯木再生重沾雨露自聞此命莫知其  
由洎獲見於清光復親承於聖訓盡出陶鈞之化曾微  
左右之容昔漢宣起張敞於亡徒漢武用安國於梁獄  
古或有是今則無之向非日月之照臨不遺隙穴之微  
陋則已廢之跡誰肯復收臣敢不勉勵疲駑宣布政令  
雖天地之恩不報而犬馬之志長存

留守到任謝上表

南陽重鎮久愧無功留鑰之人復叨寵寄祇奉綸綍初

見吏民

中謝

伏惟皇帝陛下選用列辟屏翰四方獨化

陶冶之間不為親疎之異乃眷別都之地實為創業之  
邦控引大河遠通江海之利列置諸將並擁貔虎之師  
舟車四馳賓旅荐至厯觀近世多用重臣顧省庸虛豈  
容忝冒伏念臣遭逢早歲流落中年不意斑白之秋置  
身侍從之列秉持旄鉞鎮撫方州負乘有致寇之憂老  
病非濟時之器向非荷天地生成之德被日月照臨之

明孰為先容保此弱植臣敢不瞻望京邑推廣風教之  
條勉強疲驚少致涓埃之報

安撫

蜀帥到任謝上表

潘時

奉珠庭之香火方就退閑有使節之光華誤蒙臨遣指  
印維而叱馭壓楚道以褰帷祇戴恩榮益深劇切臣中

謝

伏念臣奮身寒遠遭時盛明學古入官無孔氏淵源  
之師友奉公行法愧漢廷篤厚之公卿頃膺名節之頒

再見脩門之八郎曹高選少列清蹕既乏馮唐面聖之  
賢徒起王公登仙之羨寢陞廷尉實冠諸卿自知糠粃  
之在前惟恐駑駘之殿後孤立一意冀銷雀角之欺刺  
口盡言屢批龍鱗之逆雖荷淵衷之洞鑒其如衆口之  
難調去國逾年起家一節俾免侯瓜之次許趨面棘之  
朝訓獎至於再三感激幾於千萬捫參厯井雖重經蜀  
道之難就日望雲自不覺長安之遠退循懦質曷稱鴻  
私伏遇皇帝陛下剛健精純聰明淵懿憫勞臣下每觀

過以知仁加惠黎元將篤近而舉遠軫念岷峨之瘠廣  
搜楚漢之官致此迂愚亦預選擇臣敢不深思德意少  
効忱忠六轡如絲常使西陲之肅八紘奠枕尚成南國  
之強

潭帥到任謝上表

鼂之道

伏以祠官方慙厚祿委之帥閫遽冒優除乃叅書殿之  
華以峻中權之重徒揮感涕有覲衰顏中謝伏念臣艱  
拙不移朴忠自信顧於劇煩之地每玷使令雖乏尺寸



之功屢塵獎渥必欲殺身而仰報未嘗干寵以自營既抵大訶猶從寬典許坐縻於廩食獲歸埽於田廬誓畢此生更無餘願豈謂弱植上簡淵衷曲回天光親灑宸翰躬與帥師之列還徙翰墨之列矧茲長沙素號重鎮江山控帶民物夥繁自慚沈廢之餘不稱循良之選方欣隕首詎敢辭難此蓋伏遇皇帝陛下聖度天容皇明日照仰神機之獨運動有成功揆和氣之一陶舉無棄物顧惟極陋亦不遐遺臣敢不思蓋前愆勉收來效徘徊

去國益傾就日之誠感激忘軀終踐裏尸之志

延安帥到任謝上表

鼂之道

分陝服之漕權久慚曠職佩延安之將印仍竊誤恩寄

彌重而驚心感益深而隕涕

中謝

伏念臣稟質孱陋遭

世盛隆寢預使令過塵寵渥以致參華秘殿窺萬卷之

寶書均禮禁途束九重之金帶並踰分量深懼顛隲方

茲聞治之須才忽以朽虛而代匱顧慚一割寧佐萬分

矧惟高奴實稱重鎮控秦門戶制虜襟喉折衝間遣於

重臣憂顧每先於他路豈容樗散輒冒詔除此蓋伏遇  
皇帝陛下溥若天臨赫然神化無小無大悉主悉臣彼  
羌獨迷慕義未爲申飭武備以湏天誅臣敢不仰奉聖  
謀俯嚴師律皇威丕震宜遂革於野心驚力何施第永  
堅於死節

越帥到任謝上表

張全真

領大滌之洞天方養痾於故里懷會稽之印綬遽假寵  
於名藩拜恩不貲省已增懼

中謝

伏念臣奮身寒遠操

術迂踈早辱聖神之知寢堦政事之選曲學泥古既已  
昧於經權直道事君初不擇於夷險果由踰分遂蹈危  
機爭前而媒孽者煽浮言之百車附下而文致者溢謗  
書之盈篋告曾參而三至理或可疑畏楊震之四知初  
無甚媿賴睿明之洞照察愚悃之無他卒蒙全度之仁  
俾遂投閑之請不能者止乃分之宜重緣多病早衰永  
甘棄置敢謂曲成善貸復預使令眷懷帷幄之舊臣榮  
畀股肱之近郡審是肇新府號久駐蹕聲履句踐之故

棲厲嘗膽枕戈之志想神禹之遺跡服卑宮菲食之勞  
故此回鑾之初示同留鑰之重再命而倭曾遜避之靡  
容一節以趨豈衰遲之故憚經由行闕賜對便朝進瞻  
黼座之顯昂恍若鈞天之夢寐親被訓辭之溫厚粲然  
華衮之光榮近比所無叨蒙至渥此蓋伏遇皇帝陛下  
躬堯舜之孝弟可以通神明法文王之憂勤故能治內  
外博求良翰共濟康功念茲遺籙隆履之餘付以皂蓋  
朱轡之寵紆犬二之組視印云初近尺五之天瞻雲伊

逌謹當黽從事平易近民宣布恩言冀少蘇於凋瘵  
申嚴條教期漸弭於奸偷報國之心捐軀是力

四路安撫到任謝表

京 鏜

虞廷疇工方厠六曹之貳蜀道謀帥遽叨四路之全天  
高靡聽於懇詞地重莫知其稱塞川浮陸走未臨蠶叢  
開國之區雨施雲行已覩龍飛登極之運慶宇宙千齡  
之啟忘道途七月之勞既奔馳抵所領之州遂鼓舞布  
維新之澤臣

中謝

伏念臣生長農里遭逢聖時在高宗

紹興之季年濫塵末第逮壽皇淳熙之中歲誤玷親除  
內贊臺評外分漕計雖憂患相仍再纏於苴絰亦收召  
不棄兩辱於璽書匠卿營繕之靡聞宰掾彌綸之何補  
愧非言語之選敢期報聘於鄰疆惟乏論思之長安得  
躋榮於禁闥洎宅牧畀坤維之寄俾充員為益部之行  
次對旌一時從臣之功不五年而躡居於是職制間為  
今日諸侯之長規數道倍廣於他藩惟西陲之一隅當  
北敵之三面頃號富饒之最比多趣迫之憂距行闕八

千里而遙事每虞於壅塞養重兵六十年之久民已困  
於征輸必壯猷夙望克稱於倚毗豈綿力薄才足堪於  
推擇茲蓋伏遇皇帝陛下奉元而養萬物麗正以照四  
方詢事考言允符聰明嗣位之託臨政願治親承精一  
執中之傳凡見於今茲使令百執之間皆定於昔者叅  
決萬機之日致此隆委及於孤蹤臣敢不戴重華之舊  
恩布上聖之初政近考唐相籌邊之策遠稽漢臣樂職  
之詩念國家之重軍民所宜一體敬子孫之事父母敢



二其心

福帥到任謝表

馬大同

起家分閫欣逢舜禪之朝易鎮全閩又進文謨之直顧  
登對莫裨於初政豈愚忠上合於淵聰既見吏民具宣  
德意臣

中謝

臣寅緣末學遭際明時兩仕於朝薦至九

卿之班列一官於外備諳世路之驅馳何心毀譽之來  
但覺風波之險投閑故里寅奉真祠上流忽拜於新除  
再命旋更於隆委脩門初入當九五大人飛龍之天長

樂此來為二三舊臣歌馬之地民齒繁夥海隅晏清要  
須威名夙望之人乃稱禮樂詩書之帥夫何么麼首領  
選掄茲蓋伏遇皇帝陛下離照重明鼎新庶政責郡國  
以治理之効欲田里亡嘆愁之心畀臣二千石之章需  
其萬一分之用臣敢不舉大綱而不紊去小智之自私  
上下相安庶自得於湖山之外幽枉必達使如在於畿  
甸之間勉脩稱職之方是乃報恩之所

閩帥到任謝上表

張全真

召還經幄猥荷記憐就易藩符特蒙委寄布宣聖德慰  
諭遠民皆云遣政事之舊臣可以識朝廷之至意望雲  
仰戴夾道歡呼始拜命以兢惶既入疆而感涕

中謝 瞻

昔甌越險遠之地為今東南全盛之邦八郡支分封圻  
廣袤三山鼎峙形勢尊雄向由劇盜之震驚尋苦戍兵  
之供億公私垂罄井邑就荒加以田疇亢旱之餘仍當  
海徼防秋之日宜有撥煩之略以為善後之圖伏念臣  
才歷試而不長命數奇而寡與政途三載曾莫紀於勲

勞輔郡兩時亦未聞於課最既遭譴訶之域遽陪清燕  
之間第迫病衰力祈退縮豈謂中宸之眷敢分南顧之  
憂不敢固辭以貽擇事之譏尚期力行以勉報德之効  
此蓋伏遇皇帝陛下廓蓋容於天地躬勤儉於家邦明  
以見幾仁不忘遠察臣久侍帷幄知勤恤之為先憐臣  
嘗備藩維粗安靜而不擾濬發獨斷申加茂恩再念臣  
本無睿知最為孤藐粗由直道不敢愛身顧惟閭中稍  
遠闕下俗既纖嗇以趨利士多請寄而為奸固當守法

奉公以絕貪冒之私不敢違道干譽而懷畏避之計專求民瘼以固邦基諒無遠而不聞幸容光之必照挾知學問羊之數雖媿昔賢易帶牛佩犢之風願師循吏

成都帥到任謝上表

蘇叔黨

西南都會古稱巴蜀之雄表裏山川國本蠶叢之舊士風厚善民訟簡稀宣布詔條告諭父老咸悉朝廷之意曾不鄙夷其民故擇宗臣以告遠俗

中謝

伏念臣斗筭

小器樸藪凡材生逢日月之明得遂箕裘之志夤緣一

任寢被使令蓋嘗試之於邊陲又復寵之以延閣略無毫髮之補報徒竊天地之恩私眷此坤維號稱錦里其民務本而力穡其士好學而有文組綉被於中原富饒甲於天下厯觀祖宗之遣帥率皆廊廟之偉人顧委任之非輕知撫循之有自四刀見夢著之策以為榮兩使占星候天文而協應如臣才能無取問望素輕叨冒寵光有覲面目茲蓋伏遇皇帝陛下則堯之大法禹之勤建六官而代天工操八柄以馭臣下坐念五十州之遠

特軫淵衷必求二千石之良往宣德意知臣忠孝粗守筋力未衰使之察吏而督奸豈肯邀功而生事邊鄙不聳庶幾魏絳之能獄市無容遠師曹參之治臣敢不益堅素節圖報睿知上寬宵旰之憂次答生成之造奉天威之咫尺若臨淵冰承王命於春秋敢忘夙夜

府尹

開封府尹到任謝表

龜之道

河圖列職實儒者之至榮屏翰承流蓋聖時之盛典揣分

獨驚感恩以泣

中謝

伏念臣早繇際會久玷使令昨自

侯藩擢叅天府勉以孤忠之素守無收夙夜之微勞而  
材昧撥煩割非游刃恍歲年之再易宜罪戾之不多敢  
意加憐更叨外獎惟汴梁之故地控朔漠之上游自昔  
守臣率時名革矧茲延閣尤號華塗賜書溢於上臺分  
職尊於冊府悉容僥冒並集兢慙此蓋伏遇皇帝陛下  
恩撫萬方道凝庶績先慈儉以風四海開仁壽以納斯  
民故於共治之臣尤慎一時之選載惟今日之除擢特



出九重之眷知願承清燕之閒親稟訓敕而去請即弗  
獲理當即行不勝犬馬之情但極軒墀之戀然臣端逢  
休運屢對清光每瞻獨斷之明備識好生之德敢不勉  
驅驚蹇少効涓埃禁暴戢奸庶不生事奉法循理必期  
便民復殫九死之心敢憚三年之計

五百家播芳大全文粹卷五上





欽定四庫全書

集部

五百家播芳大全文粹卷五

中下

詳校官編修

臣謝振定

助教

臣常循覆勘

總校官編修

臣王燕緒

校對官中書

臣范鏊

謄錄監生

臣張若湘

欽定四庫全書

五百家播芳大全文粹卷五中

宋 魏齊賢

葉芬同輯

謝到任表

漕運

關中漕到任謝表

鼂之道

總戎塞上方玷新除轉漕關中復留舊任仍緣寵擢遂

進職名初無橫草之功過沐流根之澤外慙實試中愧  
空餐

中謝

伏念臣稟質至愚遭時極盛自負平生之所

學庶幾夙志之可償頃自朔方改從陝服親承訓敕勉  
就涓埃敢期下照之明亟預中權之選大懼稟姿之駑  
蹇不能宣國之威靈還即故宮重慙非據因加誤獎尤  
愧無名誓當畢命以馳驅或可酬恩於萬一此蓋伏遇  
皇帝陛下天臨無外器使惟公號令一出於至仁覆載  
舉歸於洪造肆容孤陋備竊寵榮臣敢不戒昨已非勉

今未及顧終軍請纓之志深愧前條思龜錯實粟之謀  
尚期未効

江西副運使到任謝表

趙善俊

假漕閩中方露引嫌之奏乘輶江表載叨易地之恩宮  
造曲加淵兢靡所臣

中謝

伏念臣秉質孱菲託冒神明

高廣御圖濫巾於賜第之後壽皇撫運彰纓於進德之  
前再聯郎省之清班三叨邊方之要閫兩持使節四把  
州麾初無蟬虬蟻子之容可恃為地盡出蟬蛸蠖獲之

眷幸豈非天丕惟離明繼照之辰方當鼎新凝命之日  
敢期隆委謬及微蹤雖知勉於轉輸恐難圖於報塞此  
蓋伏遇皇帝陛下紹承聖統親事法官荐出于天誕受  
至尊之付託行舜之道茂扶盛際之雍熙嚴綜核以臨  
朝詔黜陟以馭下雖小大之才可察然尺寸之用靡道  
在東宮參決幾務之初固已為國而惜士茲南面總攬  
權綱之始蓋亦隨器而使人故此翹踰萃於謏陋臣敢  
不益堅晚節靡負壯懷仰壹矩以重規獲視三朝之盛



雖薄材而綿力尚窮五技之施

陝西運判到任謝表

鼂之道

思假州麾迄無善狀寵參漕計亟荷恩私非所堪任惟

深感涕

中謝

伏念臣偶緣薄技獲並英游當神考作新

之時叨塵科級逮泰陵總核之日謬玷使令材每下而  
術愈疎力雖勞而効更寡久逃大譴終至煩言幸賴聖  
明載加辨察付之支郡責以成功終憑天地之恩獲展  
涓埃之効荐膺獎擢陪與輸將顧省竒辱覺有榮耀此

蓋伏遇皇帝陛下道參堯哲功本禹勤與物皆春四海  
無為而自化如日之照羣材不辨而已明遂致么微與  
塵恩施臣敢不益堅短尚深體至仁更誓靡損必期報  
稱

運判到任謝上表

龜之道

越從寒谷進望清光亟自冗員預叅繁使併軼初志集  
為汗顏中謝伏念臣植學弗深稟資甚下猥由經術誤  
列縉紳隨牒間闕忽坐移於歲月立身露苦敢自必於

功名幸逢千載制作之辰竊有一介激昂之志遂忘駑  
蹇異効涓埃瞻咫尺於天威被丁寧之聖訓叨塵採擇  
辱佐馳驅絕去私嫌荐蒙優渥蓋京右之地甚重而漕  
輓之務實繁密屏星畿近控關陝歲時謹陵寢之奉緩  
急備河朔之虞為官擇人非材不處顧慙至陋冒竊殊  
私此蓋伏遇皇帝陛下聖度并容皇明遍照政承帝事  
德享天心洪河九折而効清靈芝三秀而荐采茂迎福  
祉顯告太平臣於斯時獲玷誤寵敢不悉殫綿力期稱

厚恩趨赴事功勉佐裕民之政布宣德意少裨愛物之心

江東運判到任謝表

錢象祖

假守兩州曾無善狀采輶一道過辱殊私祇事云初撫躬增懼臣

中謝

竊惟江表夙重計臺屯戍相望力壯安

疆之勢糧儲不乏莫先飛輓之功况觀九郡之風謠而擅六條之督察采求民瘼稽考弊源倘非得人安能勝任伏念臣吏能淺薄學術倥侗再綴班行顧何裨於省

寺游膺郡寄第克謹於簿書適值荒年粗逃曠事臣固  
不為於赫赫人皆見之於平平甫及終更敢懷僥望豈  
謂如綸之下俾叨持節之行威顏促對於九重愚慮奚  
伸於一得亟被玉音之獎實踰華袞之褒自遠闕廷深結  
戀軒之想祇趨封部將諧將母之安退省遭逢若為稱  
塞此蓋伏遇皇帝陛下大臨四海器使羣才內廣治謨  
極法度紀綱之盛外嚴使事期德意志慮之宣退惟冗  
散之姿曷付簡求之妙臣敢不仰思隆眷俯激懦衷靡

憚馳驅務使周知於聖化誓公刺舉庶幾不負於訓言

福建運判到任謝上表

沈作礪

三輔守藩已窮鼠技七閩將漕吏冒鴻恩顧屢試之罔

功惟弗勝之是懼茲臨封部已見吏民臣

中謝

伏念臣

忝以故家濫登仕版本乏適時之才術徒懷許國之朴

忠撫字一同割雞為愧棲遲半刺展驥則非誤膺共理

之求旋與陟明之典挽粟駕一封之傳驅車登九折之

途昇以祥刑已持江右之節起之祠館再分浙左之符

政則拙而心勞力唯勤而功半誤拜使令之寵尚叨臨  
遣之榮惟茲東甌素號瘠土人鮮力田之業利專煮海  
之饒輸賦之入有常驚醴之原浸散欲盡幹旋之妙必  
資經濟之能豈緊疎庸可當委寄茲蓋伏遇皇帝陛下  
厲精漢治博施堯仁察臣久効於驅馳猶知德意憐臣  
備嘗於險阻必達民情出之絲綸寄以耳目臣敢不將  
明使指檢柅吏姦激濁揚清期追曠官之責如予為取  
少裨裕國之勲庶以涓埃仰酬海岳

福建運判到任謝表

陳公亮

都司糾察每懼素食部閩將輸復叨隆委念去國而猶未遠日幸入境而已遂觀風跼跼恩深歡呼德溥臣中

謝

伏念臣性資朴魯學植空疎徒知克己以盡公未免

直情而忤物賴作成於紹興之舍選飽藿鹽者蓋十五年運黽勉於淳熙之班聯廩廩稍者幾三十載候泮宗庠而分教匪易縣尹邦儲而盡瘁則同惟嚴瀨之分符實高宗之潛邸常賦偶叨於奏最殊恩屢沐於疇庸仰



蒙聖帝之簡知親被有聲之譽恭值飛龍之賜對側聞  
平正之稱即庾部而蠟進銓曹陟樞屬而遽遷宰掾自揣  
寵榮之過分每懷更迭之陳情屬當閔漕之闕員未勞  
弄印俄自都公而承乏竟畀乘軺矧無八郡轉輸允係  
四方之觀聽不徒欲餉餽之無關要須令疾苦之周知必  
得不吐剛茹柔之材乃能稱激濁揚清之職靖言弱質  
曷際隆知茲蓋伏遇皇帝陛下覆帔如天照臨若日用  
人惟才之盡發政無遠之忘謂臣久廁於朝行孰知德

行知臣自詭於民事欲究謫能遂令衰晚之蹤獲在臨  
遣之數臣敢不清源正本律郡吏於廉平致慮周思達  
遐邦之幽枉誓窮丹悃仰答鴻私

江東運判到任謝表

薛叔似

庠廩中都邈無報稱將輸一道復被使令初入境以觀  
風敢籲天而披露臣中謝伏念臣性資慙拙學術迂疎  
名弗振於鄉閭分甘從於州縣驟繇冗地躡處榮塗當  
壽皇燕翼之時暨嗣聖龍飛之日俱蒙異眷數近清光

徒懷許國之誠以對幽顯殊乏濟時之策有補高明意  
曠責之難逃賴恩私之曲覆匠監繕脩之役亟畀崇班  
計臺詢度之行旋膺重寄矧茲江左實邇畿封惟使事  
之繁非他部之比所甚匱者公私之積務先源流本末  
之求所當恤者休戚之情宜有勞來輔翼之政刺舉官  
吏之能否維持根本之安強豈伊凡材所克勝任茲蓋  
伏遇皇帝陛下體元居正一視同仁操予奪取舍之公  
無內外遠近之間憐臣之愚欲稍全其進退知臣尚壯

姑少試於馳驅俯狎卑悰特頒成命臣敢不恪共乃職  
惟既厥心表裏江淮因識古今之形勢光華原隰無忘  
咫尺之威顏臣無任

廣西運判到任謝表

朱希顏

上廬陵之印方就日以來歸桑嶺嶠之輶俾觀風而諏  
度遠民寄重當宁恩深臣中謝伏念臣智慮弗周才姿

曷適間闕一第奔走四方少焉有志於事功叩閭無路  
仕則徒勞於州縣推轂何人比獲覲於威顏乃誤承於

睿獎承流易地載德自天三年控竭於微誠千里粗安  
於拙政甫訖代爪之戍遽分輓粟之權曾何殊功冒是  
隆渥眷茲二廣邈在一涯官資煮海之饒民競鬻鹽之  
弊顧前後法令之更定期作於涼而公私利害之多端  
要歸於是人言弗壅物理乃宣支體或傷寧免上心之  
惻怛耳目所寄可忘聖意之丁寧獨荷主知自憐臣慙  
九殞莫憐於洪造一生誓畢於孤忠惟憂迂踈莫稱期  
待茲蓋伏遇皇帝陛下乾坤容覆日月照臨視民如傷

遠弗遺於草芥取人為善微亦逮於芻蕘推擇既寬凡庸或忝臣敢不勤求民瘼督察吏奸毋使瘠肥有若越秦之視當令蠻貊同歸堯舜之仁

廣東運判到任謝上表

雷 淦

濫司臬事深愧罔功就易計臺敢希誤寵矧部封之如故而教條之易孚自揆僥踰深增悚懼臣

中謝

伏念臣

稟資蒙陋涉世迂疎三綰縣章兩紆郡綬惟知奉法以循理敢云學道而愛人驚歲月之屢更靡勞能之可紀

偶承人之躡備使華民積困於州縣之苛吏習嫚於朝廷之遠周爰咨度猥叨廉察之權漢網濶疏莫著平反之績深慙尸素恐速譴尤值上聖之作興湛皇恩之溥博嶺海萬里犴獄一空茲曠澤之所覃在微臣而何力宣期差擇驟昇輸將事劇而責深力小而任重望不及此將報謂何茲蓋伏遇皇帝陛下如日方中法天行健緝熙庶政昭文命以誕敷照臨百官視重華而允洽適際承平之運不忘念遠之圖謂臣粗諳民情或審裕足

之計俾臣肅將使指庶殫奔走之勤惕若危衷膺此隆  
委臣敢不究心夙夜畢力圖功要俾上恩徧及閭閻之  
隱異令遐俗悉同畿甸之安

河南運判到任謝表

張 縝

推行賜粟之恩本服膺於常職敷錫明綸之寵誤進直  
於英躔方謹藩符復更使指驚寵光之頻若循涯分以  
凌兢臣中謝伏念臣拔迹寒鄉遭時盛際朴學粗通於  
章句偶試儒科天威獲望於清閒收塵策府辨魯魚而



何有審枋鷄之自安屬以惟憂飄然去國再忝麾州之  
寄三分蕩節之華庶帝德之好生每期不殺幹邦儲而  
護漕必務正辭歲華雖老於簿書民事粗更於輓軌問  
牛羊之芻牧屢叩天閤歌鴻雁之劬勞幸安邊鎖拜寵  
靈之下逮體疎遠之不遺道山隔半世之塵夢復疑於  
瀑直湘水鼓春風之棹賦欲反於離騷來從蜀道之天  
難稍覺長安之日近茲蓋伏遇皇帝陛下克仁舜孝禹  
儉湯寬體乾健而昭晉明化行風偃致泰通而持恒久

道運日新方恢車攻復古之勲每盡棧樸能官之美致  
茲屏瑣屢玷使令臣敢不夙夜在公冰霜厲志令恪脩  
於庭戶周詢風俗之便安人自得於湖山務廣朝廷之  
德意

提刑

西川提刑到任謝表

陳履常

惟蜀中之右地乃海內之上游家有刑書知而不犯地  
為沃野富以無求囹圄屢空枹鼓幾息久安周召之化

寢成齊魯之風延見吏民間以疾苦諭以寬大之意使  
無鞭撻之憂觀其歡欣見於眉睫無以為報莫知所言

中謝

伏念臣賦命數奇與人寡合以記誦之學起猷畝  
之中以刀筆之能供州縣之役居無邑里之譽孰為先  
後之容况茲罪戾之餘宜在棄捐之數因緣過聽蒙被  
誤恩備員理官久出衆人之後奉使詔獄再為萬里之  
行明大義以決疑無儒者之效奉三尺以從事有俗吏  
之譏自知甚明人望何在豈期幸會復與選中用過其能

恩非所望此蓋伏遇皇帝陛下以神明之德當制作之時樂與諸臣慎守成法明揚不次之位期致非常之人顧臣之愚何以為報謹當竭犬馬之力收桑榆之功明慎庶刑慰安遠俗以身許國不知蜀道之難視日近人信有長安之遠臣無任

曲江提刑到任謝表

汪彥章

奉將親養人榮故里之歸就易使華地止重湖之隔休舍甫溫於坐席乘輅即次於提封

中謝

伏念臣本非通

材出偶嘉會由銅墨徒勞之賤誤冕旒特達之知兩膺  
臨遣之榮五玷將明之選比自遐方之內徙幸蒙私計  
之曲從復被更書俾移鄰部上聖體好生之德舉寰區  
皆遠罪之民所至囹圄空無煩臺治第負揚於明眷實有  
媿於厚恩茲蓋伏遇皇帝陛下治本隆寬時臻累洽大  
為成法於庶言庶獄以罔兼詳責有司恐匹婦匹夫之  
失所而臣再蒙一路之寄悉在大江之南雖山川封域  
之或殊而閭里人情之未遠唯當緣飾以經誼不獨拘

學於簡書庶臯陶在泮之風成虞舜畫衣之治刑無刑而廣上意敢不盡心老吾老以及人親尚期從欲

永興提刑到任謝表

李成季

從事府僚訖無善狀祥刑陝部遽忝誤恩祇命入疆撫躬失次

中謝

伏念臣學非知與才不逮中晚綴詞科濫

登仕版猶未棄詩書之習初不更州縣之勞講藝泮宮無以應諸生之問校文芸閣莫能窮未見之書朝廷勸養之甚優事業空疎而幾廢低徊末路慙負盛時未嘗

赫赫以動人姑幸循循而寡過勉從吏責出佐藩方甫  
及再期而還寢遷大尹之佐顧浩穰之多責益卮勉以  
自持實有媿於吏能偶遂逃於官謗屬以田廬蕪沒兄  
弟凋零孤窮不收嫁娶未畢事君之義固內外以一心  
在臣之私有出處之異勢屢殫愚懇過覲便州豈謂天能  
聽而弗違日雖幽而必照不加以罪曲盡其情特優假  
於使華俾分持於邦憲量材非稱冒寵若驚况闕中之  
輿區為天下之劇部廣輪者三千里襟帶者十八州氣

俗喜爭動成抵冒山林多阻易致奪攘必得通明之才以均察治之寄如臣煩冗遇事濶疎雖知大任而盡心尤恐力微而敗責此蓋伏遇皇帝陛下性齊舜哲政邁湯仁表德禮以示人亶誠明而格物將使路遺不顧人有夷齊之心田畔相推家成虞芮之俗臣敢不仰思欽恤俯務靜安閑於無事之時衡以至公之聽鄉鄰不擾刑獄無畱誓殫夙夕之勤力圖毫末之効澄清之志非敢望於古人忠厚之風期少裨於聖治



京東西路提刑到任表

李成季

詳刑陝右已乏事功易部畿東再叨恩宥量材非稱載

寵若驚

中謝

伏念臣賦性迂疎聞道蹇淺沾濡薄祿游

從聖時學文未去其陳言從吏不聞於善狀亦嘗陪書  
林之豪秀佐天府之浩繁必有可觀未始錚錚而驚世  
竟無他異但能碌碌以同塵屢懇便州竟分煩使事滋  
多而智窘責已重而心危勵志竭精知蠢愚之無補累  
日易月顧罪戾之益深久玷官聯坐糜廩給方申前請

復俾就遷既奔命於戴星徒搖心而望日惟京都之舊壤連海岱之故區生齒日繁獄訟惟冗豈惟孱緩可使澄清攬轡登車慙非任使過家上冢預有榮光此蓋伏遇皇帝陛下堯性自天舜功成物措世於中和之域導民於禮義之風將使四海為家有外戶之不閉羣生成遂無一夫之向隅臣濫總刑章恭承德意敢不究心審閱先事禁防寬猛以和上下無擾勉立涓塵之効仰酬覆載之恩臣無任

京東東路提刑到任謝表

李成季

承乏再期訖無裨報易官東部尚玷恩榮循省已還兢

凌失措臣某

中謝

伏念臣學非稽古才不過人晚登仕

版之榮寢通朝籍之貴兩叨持節三見周星疾病相仍  
安恤陰陽之患精神具耗敢言犬馬之勞多慮近迂積  
憂成畏姑幸屏心而遠罪未嘗飾智以近名審閱獄詞  
唯恐失好生之意艾除偷黨庶幾惟瘳惡之風間屬年  
穀順成生民咸遂枹鼓之驚幾息桁楊之繫亦稀皆神

明之化陶成非奔走之臣能預方將束裝待罪指日言  
歸豈謂寬恩復更華使去長安之日雖遙千里之園望  
岱宗之雲猶均一雨之潤文書有報復之速吏職無將  
迎之勞昔乃吾鄰盡為屬郡今雖別部曾是故僚顧如  
此之便安實非臣之覬望而況全齊大國瀕海奧區水  
極魚鹽之饒陸多桑柘之美大姓挾貨而犯法細民禦  
貨以為姦非有強明之才孰分察治之寄自惟迂暗難  
稱使令此蓋伏遇皇帝陛下憲天聰明體道變化紹復

先王之政圖終寧考之功御一世之英豪納四方於仁  
壽夫何微品亦備下僚謂臣無他已嘗試之任使察臣  
寡過猶將責以事功蓋天地之大而無私日月雖幽而  
必照敢不勉脩官責祇奉憲條察辭於差庶不愆於明  
慎除惡務本使無害於善柔誓有補於涓塵期少酬於  
覆載臣無任

江西提刑到任謝上表

陸 洸

充員司庾初無斂散之功易節祥刑復玷平反之寄望

輕責重感激涕零臣

中謝

伏念臣樗櫟凡材箕裘末學

壯心凋落嗟勲業之無涯晚歲侵尋誓朴忠之自守差  
池郡縣奔走埃塵剖竹湖陰素乏循良之譽登車江右  
曾微排幹之勞宜黜而遷以榮為懼頃嘗攝事雖粗諳  
珥筆之風今拜誤恩豈足贊畫衣之治而况案牘山積  
鈛甬日滋非于定國之平何以雨東海之旱匪顏真卿  
之敏安能雪平原之寃必得惟明克允之倫乃稱從欲  
以治之意顧如蒙鄙曷副選掄茲蓋伏遇皇帝陛下舜

德好生文謨克宅期有司之不犯貴庶獄之罔無遂今  
疎遠之臣就試簡字之聽臣敢不仰遵聖訓俯枕吏奸  
體漢網之濶疎俾皆遠罪廣周家之忠厚庶使興仁

提舉

淮東提舉到任謝表

汪彥章

臨遣江壩方冒責成之寵改除淮甸更叨從欲之仁即  
至封陞共宣德意蓋始望未嘗及此雖自謀何以過之  
中謝  
伏念臣綿力薄材寒鄉悴族早襲縉紳之後浸膺

鞭策之榮往莅閩區無補摘山之政洎歸魏闕遽分原  
隰之華入承當守之清閒中喻理財之曲折及瓜尚遠  
索米為憂蒙造物之寬恩與臨流之近地謂一方稍病  
失春耕秋斂之常欲比屋皆蘇宜朝令夕行之速共布  
哀矜之詔以寬流冗之民豈臣蠢愚堪此優寄此蓋伏  
遇皇帝陛下恢張治具駕馭人材垂衡聽以並觀遇寸  
長而必錄有如孱瑣亦玷使令臣敢不仰承睿訓之丁寧  
不誤淵衷之紹述每懷靡及寧辭四牡之馳驅迄用



有成願上三年之詠頌

江西提舉到任謝表

趙汝謙

假守光山印僅逃於曠敗馳軺江右頒綸復玷於使  
令還家無坐席之溫申詔有從行之命戴天施厚伏地  
慙深臣

中謝

伏念臣稟質迂疎臨事朴拙曩由塵埃之

末吏獲對日月之清光恩疏更秩之榮任重字民之寄  
服勞叢邑盡瘁邊州自慙已試之罔功每恥詭隨而希  
進敢期今日之春知迺蒙超躡之踰等矧是提封實惟

劇部常平數廣寧免於具文茶榷事叢尚多於積蠹必  
得財貨源流之道始知公私取予之宜豈茲謫能冒祈  
隆委茲蓋伏遇皇帝陛下知人則哲視遠惟明念臣節  
用以愛民或可提邦財之斂散灼臣奉公而守法庶能  
察吏治之否臧假之重權責以成效臣敢不肅將上旨  
激厲夙心攬轡澄清益佩光華之寵問民疾苦仰酬覆  
露之仁

江西提舉到任謝表

黃維之

承流支郡方慙滿歲之罔功乘傳鄰封叨竊疏恩之躡

等不崇朝而及境即交印以觀風揣小己之非宜報大

恩而何以臣

中謝

伏念臣早游庠序本起農家荷高宗

之教育十三年沉淪舍選洎壽皇之朝班四五考蹭蹉

周行初列屬以成均繼負承於棘寺懇求外補因獲對

揚抖擻愚衷誤蒙喜納馴致孤蹤之綿薄久安衡宇以

徜徉已列朝冠俄紆郡綬人沮西華之為大天開虞帝

之達聰畀星渚之名邦號江東之道院地荒民寡田瘠

賦苛庭有銘甯人無根蒂雀鼠角牙之莫辨雁鳬去集  
之無常第行王政之中和仰體詔條之寬大誨求民瘼  
禁柅吏奸民瘼未除惟恐拊摩之弗至吏姦或露寧容  
箠扑之不施悉出公心初無偏徇以短弊讀注疏之眼  
而閱案牘曲直自分以太學食藿鹽之味而措賦財經  
常亦足秋稅減多收之耗夏場蠲縻費之煩趨以農時  
年有豐登之慶為之醫藥戶無瘠癘之憂如臣至愚何  
力之有端自聖神之作潛來天地之和久此尸官亦逃

司敗初書下下之考遽竊皇皇之華煮海摘山茲固儒  
臣之短拙盈倉億庾亦知仁政之發施誓當尺寸之長  
少効毫分之補茲蓋伏遇皇帝陛下離明麗正乾健自  
強堯盛舜隆不外執中之道武承文謨迄成卒伐之功  
謹初政之權輿寄外臺之耳目知臣究心撫字必能持  
歛散之權察臣稟性慙愚決不負將明之寄援之斗壘  
畀以星軺臣謹當祗佩龍光載鞭駑鈍奉六條而察二  
千石要當激濁以揚清馳四牡而行十一州務在膏枯

而醒惺

浙西提舉到任謝表

張孝芳

攝承郎省方懼曠廢廉問郊圻遽塵差擇甫出闕門之外旋驅封域之中延見吏民布宣德意愧寵靈之誤及凜綿薄之弗堪臣某

中謝

伏念臣性本遲鈍學顛迂濶

服勤吏事初絕望於榮塗謬被薦書遂特蒙於嚴召周旋學館坐閱四朞緝容臺亦幾兩載星闈無繇殊乏微勞天陛對揚魯亡奇策循內外更迭之制自詭治民

遭神聖特達之知過叨煩使光華所被冒昧難勝仰惟  
勵精之初方舉責實之政分道而置擇人以公賧三吳  
之隩區繫千里之近甸本根攸繫膏澤宜先并兼莫戢  
而利盡於富强賦役不均而害遍於貧弱課嚴筦庫惟  
未究斯民生聚之原法備常平尚恐失先王斂散之義更  
治之臧否或浮於事實民情之疾苦猶壅於上聞必得  
忠信之人乃副將明之寄顧如鴛劣亦與選掄茲蓋伏  
遇皇帝陛下器使臣工試其政事恩施吐隸首自京師

謂臣生長閭閻頗知利疾念臣更厯州縣粗守廉隅拔  
諸庶僚之卑付以一節之重臣敢不虛心諏度悉力馳  
驅散利薄征深體聖朝之寬政愛人節用勉思先哲之  
格言庶少効於涓埃冀仰酬於覆載臣無任

淮東提舉到任謝表

李祥

十載周行官有慙於宿業八州漢部計豈仕於乘輅詔  
玷選掄俯深兢厲中謝伏念臣膠庠陶化州縣服勞魯  
微試吏之寸長粗識立身之大節入官一闕已甘老於



選階出命九重爰濫班於朝序冒成均之講誦贊農扈  
之經常右府編摩太宗佐貳由憲曹之兼攝躡武監之  
陞遷皆非夢想之所期率自神聖之博取頻露踐更之  
請訖叨隆指之將載惟南渡財賦之淵尤藉東淮醴薺  
之利重時民事加惠邊氓所宜妙簡於賢能乃始不孤  
於鞭馭傳聞疇曩賦入浩繁資公私冒沒以無饜致內  
外徵求之咸萃開耗蠹之門而不得革其弊掣刺舉之  
肘而罔獲盡其公譬諸一鄉之富民長作百家之怨府

雖清朝擇人以堪遴而寒士得此以為憂共惟壽皇臨御之長備究淮堧設施之要粵從近歲稍用儒生謂其禍福不計其身謀利害必先於國慮有如庸瑣胡取馳驅茲蓋伏遇皇帝陛下出震當陽重離繼照軫十聖神州之念重兩淮益筭之優知臣莫若君曾是議堂之叅決與人不求備一遵聖帝之規模遂致孤微亦蒙任使臣敢不恪恭吏責寅奉詔條薦章靡徇於人言惟公是舉鹽本無虧於亭戶厥利自優服壽皇臨遣之訓詞酬睿主

兼容之恩紀

浙東提舉到任謝表

袁說友

一再命以為州咸無善狀六百石以察部誤拜渥恩身  
慙安便之為優衆謂甄陞之特異乾坤德大毫髮命輕

臣

中謝

竊惟斂散之微權莫重常平之使者山澤之利

以裕國倉庾之儲以均民惟源流本末之阜通則上下  
有無之無足匪特欲九年之益蓄亦戒夫一孔之不遺  
恪持經常常辨取予至於民情休戚之本吏治否臧之

分事每壅於上聞澤乃周於下布求稱厥職蓋難其人如臣慙愚殖學荒淺謂其常更中外之職有志斯民尚可俾乘輶傳之馳往承休德庶以異時宣布寬大之意而為今日激揚清濁之分曾下下之考而未書迺皇皇者華而遽遣就臨所部實寵其行茲蓋伏遇皇帝陛下器使群工鑑觀庶物與我共理倘里田有庶民之安惟爾之能則命秩示列城之勸博求膚使下及孤蹤臣敢不尊其所聞期於不負無政事則財用不足肯務空言

或登攬有澄清之風尚希前哲力殫素學仰答殊知

江東提舉到任謝表

周必正

公朝遣使常求拔萃之賢小已何功誤沐臨軒之寵未  
遠長安之日已觀屬部之風佩上德以惟深揆此材而  
不稱臣

中謝

伏念臣本非時用粗讀父書少常有意於

功名晚分徒勞於州縣偶因論薦洊被弓招繼荷選掄  
得塵班列旋引親嫌而外補猶希幼學而壯行周旋兩  
郡之間荏苒十年之久齒髮已踰於耳順樵漁屢決於

心盟自甘平進之餘生無復叨榮之末路忽蒙記錄使  
玷將明煮海摘山豈特奏征商之課左食右粥願首推  
濟衆之仁雖云自信於顓蒙終恐莫伸於報効茲蓋伏  
遇皇帝陛下道隆堯舜運濟成康當飛龍御宇之初擴  
威鳳來儀之化賜對廣君臨之照聽言忘日昃之勞天  
表粹和玉音恩厚察至愚而屢獎謂三策之可行既憐  
疎賤以無收足認隆寬而盡下致茲孱陋亦預使令臣  
敢不祗服聖言勤求民瘼宣惻怛於困窮之際謹咨詢

於原隰之中遠有光華奉天威於咫尺庶無罪悔助帝  
力於毫分

廣南提舉到任謝表

王祖光

方海邦之秩滿僅免曠官適鹽筴之議更遽叨煩使聖  
恩天大臣命毫輕曾豈憚於驅馳第當勤於咨度臣中

謝伏念臣備嘗州縣綿厯歲時領瓊管之一麾涉鯨波  
之萬里絕無榮望驟被遷除念昔充漕幕之員常躬督  
差丁之役權歸公上利盡計司故有一十餘庫之贏資可

當二十五州之經費頃緣湖寇橫絕淮商諸路悲仰給  
此間大農乃增羨其額及夫兵戈之定無復民旅之來  
名數空存公私始困重以累年更張之論至為二廣以  
通敗之謀未始推原竟成聚訟要之東路便於客鈔西  
州利在官船俗豈可以強同弊悉由於偏用惟以全而  
即事毋執一以為功東不至發泄之不行西則使烹煎  
而無乏庶幾兩盡奚待多言茲蓋恭遇皇帝陛下明照  
四方智周萬物灼羣情之利病咸與維新約中道以罷



行豈容循舊至今疵賤得預講求臣敢不拜命周章疚  
心經畫亭戶失本柄而散徙首務招徠客舟操空券以  
稽留亟當趣下次趣八桂尋至五羊索要領以奏陳寬  
冤疏之憂顧



五百家播芳大全文粹卷五中

欽定四庫全書

五百家播芳大全文粹卷五下

宋 魏齊賢

葉芬同輯

謝到任表

提鹽 糴使 市舶 提點

制置解鹽到任謝表

鼂之道

參預漕權閱日尚淺專司鹽筴戴恩獨深人微施隆感

極涕隕

中謝

伏念臣學嘗有志慙實無他雖慚簿領之

小才粗識忠孝之大節親逢睿聖獲効馳驅遠自漢中  
近陞闕右已深虞於滿溢敢復冀於超遷惟茲澤實之興  
實曰秦闕之利乃因任而置使以裕財而便民豈容甚  
愚仍玷茲選此蓋伏遇皇帝陛下仁天遍覆惠澤旁流  
和氣所加珍祥自應顧已臻於極治尚申救於庶工雖  
在散材亦加器使積雪百里少裨富國之謀實稟九年  
更助安邊之策誓殫死節圖報寵靈

河北耀使到任謝表

汪彥章

久汙郎選甘為襍被之行擢領使華叨奉資糧之寄銜  
命朝離於觀闕迎親夕至於封陟恩本曲成榮逾始願

中謝

伏念臣鄉緣朴學冒處周行甫辭州縣之徒勞即

玷朝廷之臨遣寂無稱効積有悔尤黜持江外之麾收  
預省中之籍翳上皇保全之厚嗟孤生報塞之難逮茲  
煩使之乏人復以薄才而奉詔唯河朔襟喉之地實兵  
屯飛輓之衝欲貿新陳長有餘而實塞當權輕重無甚

賤以傷農方大計之仰成豈至愚而能辦此蓋伏遇皇  
帝陛下鼎新庶政鈞播羣材因時內外而試以百為隨  
器方圓而取之數路顧斷斷鼠竊之技雖匪材堪然拳  
拳烏哺之情可無祿養未投閒散仍獲使安臣敢不力  
効涓埃無忘夙夜金湯積粟上寬當宁之顧憂犬馬依  
人日候乘輶之歸報

福建市舶到任謝表

張遜

星環北極久綴於朝班地重南閩濫司於商舶甫策羸

而入境即揆日以承勞施厚難量人微知幸臣

中謝伏

念臣早蒙教養晚竊科名兩任字民僅逃官謗七年就  
列累冒恩除自知僻守以昧時輒露忱辭而丐外天聽  
甚邇人欲必從蓋今日通商而置官實成周司市之遺意  
無者有利者阜要權取予之宜綏斯來動斯和貴有招  
懷之道惟詳加於簡拔庶或見於施為孰謂才卑乃堪  
器使茲蓋伏遇皇帝陛下統傳堯舜德廣乾坤務在養  
民仍寬於征賦不寶遠物悉走於梯航畧臣史氏之術

踈俾臣董時之貢入雖事權非諸使之比然責任亦一望之臨臣敢不仰戴鴻私俯竭駑力忠信以行矣捫心益懼於不能文德以來之稽首無忘於歸美

提點坑冶到任謝表

宋子京

三丞洊厯尤慙冊府之華一節疏榮猥冒鐘官之寄即近封而視印係遠道以驅車豈伊非材堪此隆委臣

中

謝竊以當今之大計正仰東南厯觀自昔之利源必資山澤然地寶偶時乎顯晦則貨泉因是以羸虧欲流布



而不寤在幹旋之有道如臣魯昧見謂濶疎再玷曲臺  
僅能雅拜晚游中秘滋愧空餐兼躋於曹郎迄何聞  
於古事忽叨是選莫測其由雖口不言錢敢效晉人之  
俗第民多盜鑄頗容漢世之姦退自省循若為稱塞茲  
蓋伏遇皇帝陛下體元居正足國裕民謂愚臣久涉於  
周行粗知廉介而儒者罕適於世務姑試劇煩臣敢不  
佩九陛之玉音走百城之輶傳念未閑於心計曷致錢  
流冀益示於身先庶臻貫朽

守

濟州到任謝上表

鼂之道

荐將使指迄無均節之功冒典州符復有便安之幸恩

逾榮而莫報量已過而知慙

中謝

伏念臣性實顓蒙才

惟中下粗安義分不敢希求當大君躬攬庶政之初顧

微臣首玷常平之選奉揚德意趨事赴功雖無補於熙宸偶

獲逃於大譴荐煩易地積愧空食終更尚玷於使令內

省載慙於僥倖此蓋伏遇皇帝陛下懋昭舜孝久蹈堯

仁務咸使於羣工用丕承於先志故令弱植均被皇慈  
砥節立名雖不能奮起於事業奉令循理庶幾企及其  
輩流

象州到任謝上表

高子美

量材東藩措懷退斥之虞剖竹南州躡被承宣之寄即  
工云始驚寵未安

中謝

竊以周武之仁不泄邇而不忘

遠堯帝所病在知人而在安民肆惟僻陋之區尤賴撫  
循之吏顧茲象郡邈在狼臙繫民瘼之難聞宜天心之

曲軫必求豈弟式共理平如臣之愚實世所棄橋門壁水  
嘗被教於先皇槐簡藍袍復蒙恩於陛下一行作吏百  
不遇人徒欣寸祿之及親未殞微軀而報國夫何遭遇  
獲備使令此蓋伏遇皇帝陛下如日照臨譬天覆幬罄  
四海而仰德列多辟以設都謂飭吏莫尚於儒故與人  
不求其備遂分偏郡姑試老生臣敢不廉謹律身寬平  
布政勤恤民隱但忘愁嘆之聲茂暢皇風靡間遐邇之  
壤庶殫駑力上答龍光

平江到任謝上表

張全真

忱辭屢瀆方甘斧鉞之誅睿賧有加更冒藩維之寄布  
宣德意周覽民風咸云輟帷幄之舊臣所以惠朝廷之  
近地雖瘡痍之未復知休息之有期責望甚深兢慙罔  
措

中謝

伏念臣才不足以任重智不足以見微向以樸

忠親逢睿獎周旋政路但知數馬之恭鎮撫帥垣僅載  
帶牛之俗甫去朝而再閏蒙趣召於三秋溫詔嗣頒脩  
途夙駕密陪清燕榮冠邇聯第迫衰殘久苦負薪之疾

坐尸寵祿茂聞橫草之勞再三滙危惻於冤疏萬一報  
大恩於香火豈謂隆天之博施未忍棄捐復分便地之  
名藩曲加任使況闔廬之故國為行殿之陪都門號龍  
蛇恍已迷於陳迹臺游麋鹿驚復見於明時地名富庶  
而帑廩屢空歲幸豐登而孳亡系道夫豈既愆之力可  
收共治之功茲蓋伏遇皇帝陛下勤儉守邦欽明迪德  
網羅衆俊休休焉若有容體貌大臣下下以成其政謂  
臣守兩越之地粗免瘵官付臣以三吳之民更觀來效

親承褒語不許辭榮臣敢不瘁身以字民力疾以從事  
倘能小補其敢告勞驟遠楓宸實馳魂於鳳闕顧瞻梓  
里庶經始於菟裘尚期終惠之私俾遂養疴之志

湖州到任謝上表

張 澈

錫對便朝被玉音之褒寵承流輔郡拜奎畫之丁寧恩  
重丘山感淪骨髓曾靡掩於信次已祇布於教條臣中

謝  
伏念臣才不逮中智難語上本無奇於抱負粗有志  
於事功劇邑字民嘗叨召審偏州佐治徒効拙勤一麾

將志於乘邊六院猥陳於司鼓遼王畿之歲歉將使指以星馳霑品秩之陞陞綴宗藩之簿正居慙濫次有覲素餐敢期命出於九重忽奉對揚於三接天光下逮玉色載溫無狂狷之輸忠荷聖神之過聽百生際遇千載寵榮畀巨屏之蕃宣佩細書之誨飭時惟古言實號名邦事簡俗淳共知非昔政平訟理莫難於今征輸虛積於負逋財貨致虧於本末全賴守臣之風力式如聖訓之昭回要有通物成務之才乃副治劇抑強之寄顧惟



庸陋曷與選掄茲蓋伏遇皇帝陛下道際乾坤仁均雨露與人不求脩各盡所能共理必惟良弗輕其任臣敢不仰遵詔旨俯察民情無愁嘆則田里安勉圖稱職有政事則財用足當務究心臣無任

嚴州到任謝表

張欽夫

奉詔中陞分符近邦已見吏民敬班條教

中謝

伏念臣

稟資不敏涉道未深誦編簡以窮年粗守趨庭之訓雖江湖之屏迹敢忘向日之心貌茲憂患之餘特軫記憐

之舊既將詳試以民事又使密邇於行都賜對聽庭曲  
形睿獎辭闕未更於積日驅車已屆於新封仰在望之  
雲天依歸曷已顧來迎之父老責望謂何此蓋伏遇皇  
帝陛下勇智繼湯聰明法舜謂意誠心正澄源雖自於  
朝廷然本固邦寧共理亦資於牧守夫何迂憊乃豫選  
掄惟是此方素稱瘠土而其輸賦獨重他州編居半雜  
於山林稔歲猶艱於衣食觀其生理良足興嗟謹當咨  
訪里閭推原根本悉陳利害之實仰覲恩澤之流視民

如傷用體大君之德意為國以禮更思先聖之格言

靜江到任謝表

還之寓直假以介藩祗服訓詞已臨官次臣

中謝

伏念

臣稟資甚慙涉道未深徒以早被於教忠故亦粗知於  
守義頃由郎省入侍經帷方聖主之有為思延忠謹愧  
下臣之末學無補高明居然半載之間負此素餐之責  
獨有孤危之迹上廣覆護之私終畀使州使歸故里甫  
及瓜期之近更叨改命之榮此蓋伏遇皇帝陛下愛養

人才重惜名器謂臣鈍不生事或可責以撫摩察臣愚  
無他腸示不忍於捐棄惟是桂林之地夙專制閫之權  
盡護邊蠻南極嶺嶠深虞綿薄莫副使令臣敢不思既  
厥心克共於事奉法循理期躬率於遐方和衆安民用  
仰承於皇武

江陵到任謝表

張欽夫

便私有請已愧乘軺改命彌憂又叨分閫仰承德意既  
見吏民臣中謝伏念臣惟全楚之上流實皇家之要屏

居吳蜀之會屹形勢之相關控襄沔之衝渺規摹之甚  
遠自戎馬平寧之後亦歲時閱厯之多田土膏腴莫盡  
新耕之利人烟蕭瑟靡聞舊觀之還既富庶之未臻諒  
恢圖之難濟孤聖旨有為之志虛輿人望治之心謀帥  
之艱於今尤甚茲遴選乃及微臣茲蓋伏遇皇帝陛下  
下明並日中仁同天大念臣服於先訓亦有意於捐軀  
謂臣守有愚忠或可望以立事肆加明試不忍遐遺臣  
敢不務集衆思勉圖來効事君以勿欺為主期利害之

實聞禦侮以得民為先當本根之力護庶幾毫髮仰答  
乾坤

平江到任謝表

呂伯恭

隆委難勝期於顛踣鴻私曲被遺以便安分書殿之榮  
光備侯藩之將觀度越常典昭明異恩臣

中謝

伏念臣

際會兩朝推移三紀爵久踰於始願學浸負於初心越  
從蜀道之歸亟冠禁途之遽經帷詞禁史觀銓衡持凌  
瘁之孤身萃高華之極選志彫氣餒日慙職守之隳責

厚憂深居有簡書之畏青災押至疾疹相乘斷外假於  
郡章覲遠收於朝蹟賾茲茂苑近在脩門置身未外於  
函闕顧影忍違於文陛此蓋伏遇皇帝陛下聖神立極  
中正體乾宇萬物以無容陶成罔間品羣材而並用陟  
降無私眇然簪履之微假以蓋帷之施臣敢不播敷詔  
令懷輯里閭增主之明廢任莫追於前悔務民之義疚  
心尚補於夙愆

筠州到任謝表

代

呂伯恭

九畿星拱並受詔條萬乘天臨誕敷宸指雖陋邦之代  
匱亦德意之親承具以聖謨告於裔土竊以舜門穆穆  
輯瑞以朝諸侯湯網恢恢受球而綴下國思皇盛旦率  
履舊章肆勤前席之浴溥及左符之寄腹心屏翰臂指  
豪英凡拜賜於朱轡咸觀光於丹扆如臣者至謗而拙  
甚愚以疎弓箕久負於家傳簪笏偶逃於官謗長江右  
壤筠水附城盼竹使以承流已過斗升之量款楓宸而  
錫對幸瞻咫尺之顏此蓋伏遇皇帝陛下濬哲文明剛



健中正上天下地酌民瘼以廣求小紀大綱收主威而  
總攬邈在山河之外皆如庶陸之前臣敢不遵奉章程  
慰安黎庶惇行教化漸消刀筆之風恪守部封少効挈  
瓶之智

吉州到任謝表

代

竊罪倉曹無裨邦計分憂江國尚玷藩條丁寧臨遣之  
榮怵惕拊摩之責庀官甫始拊已載兢

中謝

維是廬陵

介於楚甸土膏而人瘠物夥而俗貧萬室連甍剽奪時

鳴於桴鼓千艘銜尾轉輸日困於舳艫匪時通材疇荷隆  
委如臣者賦資謗薄涉世濶疎兩郡民編茂矣慰安之  
效二年省掾居然尸素之慙亟求襍被之行復與剖符  
之寄力綿識耗責重事叢惟仰恃於乾坤或俯資於塵  
露此蓋伏遇皇帝陛下配天立極繼聖御圖恢舉閭幕  
網在綱而不紊操持大柄臂使指而必從雖遠在於江湖  
猶近臨於軒陛臣敢不布宣詔令懷輯里閭急効近功  
忍自謀於寵利深根固本誓勉盡於拙誠

南安軍到任謝表

代

小壘漂搖溫受拊摩之責清都闕遠傾就望之誠祓飭忱辭冒聞淵聽

中謝

睠焉敝邑控彼荒陬大江之南

朝貢雖數千里中興之後生聚餘五十年誰諭民編俾知帝力如臣者置身冗散游世奇窮早厭干戈微悟息兵之深旨晚觀詔令稍窺更化之闕規誓與疲瘡共安易簡恭惟皇帝陛下妙參乾始靜順道原閒燕齊心自得大庭之館監觀孝治不遺小國之臣太極開先萬生

欽定四庫全書

五百家類纂卷五下

十三

建寧到任謝表

代

呂伯恭

輔郡罔功方籲天而憑懇潛藩非據乃易地以疏恩優假至深凌兢曷已伏念臣奮由平進親受異知叅言語侍從之流遭逢甚厚責獻納論思之効稱塞缺然假寵清廟分憂近甸拊摩無術幸及於食新全度有加訖蒙於念舊惟建溪之作屏實代邸之啟封屬此丐閑眷焉

改畀官遊未遠驅馳尚記於壯時民力已殫凋瘵頓殊於前日姑勉圖於綜理恐終負於使令此蓋伏遇皇帝陛下明燭萬微惠綏群獻本末輕重咸歸統御之中小大長短不出範圍之外顧如衰鈍亦獲便安臣敢不上體曲成益思盡瘁士風里俗雖粗識其二三王澤國章曷布宣於萬一

池州到任謝表

代

淮壖乘障初無固圉之功江表干城復玷承流之寄甫

欽定四庫全書

五百家類纂卷五下

十四

祇職業恭布詔條

中謝

伏念臣繆膺世賞之延濫綴官

聯之末投身冗散降命奇窮曩隨牒以戍邊適傳烽而餽備當戎馬之侵軼屢瀕至危賴王師之奮張卒獲自保偶逃龜櫝之毀復玷魚符之分矧池陽之興區乃江表之重地干戈再戢則必佩服苞桑之戒兵農雜居則必洽比細柳之屯匪時闕材疇荷隆委茲蓋伏遇皇帝陛下剛健中正齊聖廣淵賜十行之書留神萬國考三載之績久任官師自驚流落之蹤亦預使令之列臣敢

不悉循侯度祇若政經輯寧凋瘵之餘容度弛張之要  
道上德意如瞻咫尺之光同衆戚休敢顧斗升之祿

廣德到任謝表

代

厲精之朝嚴於置守坦明之訓飭以臨民佩天語以在  
塗參土風而問俗竊以大江之右一障甚微行關之旁  
九畿莫近地輕而責重賦寡而費多指日待糧皆尺籍  
伍符之舊無時致餽當大車駟馬之衝紛罷遣之相仍  
凜支持之不暇誰與領此厥惟艱哉如臣者受性顓蒙降

才謏薄東西隨牒飽郵傳之風霜旦暮坐曹老簿書之  
歲月豈期末路驟試小邦茲蓋伏遇皇帝陛下齊聖廣  
淵剛健中正輪連輻集合華夏以來王綱舉網踈總方  
維而受職矧在封圻之內實同庶陞之前臣敢不遵奉  
詔條慰安閭里挈瓶假器誓殫守邑之勤毀瓦畫墁少  
答食功之義

黃州到任謝表

代

呂伯恭

提邊符而乘障愧非禦侮之材佩郡紱以長民莫稱承

流之寄撫躬踟躇泣事凌兢臣

中謝

竊以羣萬國之與

圖大一王之統御地分遠近之別政有先後之差繫牧  
守必得夫循良則黔黎庶底乎康乂睠惟小壘介於長  
淮雖事簡而俗醇實望輕而責重登覽故迹多名勝嘯  
歌之餘參考前聞亦豪傑馳驅之舊肆求共理必東異  
能如臣者朴拙孤蹤凋殘遺疾冥心造化已絕意於紫  
青屈首簿書第研精於朱墨伏遇皇帝陛下錫天勇智  
受命溥將日月光華悉在照臨之下乾坤高厚咸歸覆

幃之中凡茲銅虎之盼尤謹玉關之戍曾何疎賤亦與  
選掄臣敢不布宣詔條輯寧閭里挈瓶守器誓力保於  
封陲毀瓦畫墁敢坐縻於廩祿

南安軍到任謝表

職方之籍用列附庸公車之章乃容專達恩既均於錫  
土誠復敢於籲天

中謝

惟嶺下之小邦實江西之勝處

廐傳据南北之會廩稍積前後之增民力凋殘無以追  
隨他郡地望卑薄不足動搖有司既弗克勝復難自慙

秩居人後憂在衆先如臣者聲迹至微技能甚短折肱  
州縣雖險阻之少嘗屈首簿書顧神明之已耗晚推遷  
於宦牒誤畀付於守符若為拊摩以稱臨遣此蓋伏遇  
皇帝陛下敷施鴻化不冒上仁視邦選侯方旁求於名  
杜考圖數貢亦固間於邾滕凡有識知同歸覆幬臣敢  
不布宣詔令遵奉教條尺寸之膚護養何裨於大體斗  
升之水涵濡終覲於餘波

盱眙軍到任謝表

霍仲荒



負丞戎監功無塵露之微假守邊陲恩有乾坤之大疾  
驅造壘揣分踰涯臣中謝伏念臣黷舍諸生華門寒緒  
早濫塵於科第旋祗役於簿書十載江淮粗結功名之  
想一心夙夜頗嘗幕府之勞適由當路之知致有文章  
之薦誤蒙收召趣對近嚴隆恩過沐於褒嘉華秩驟膺  
於陞改憂深自說方庇職於民封祿甫及親存挺災於  
私室偶金屬息始召餘魂已甘永棄於泥塗豈意復燃  
於灰燼董鬻貨生財之府稽聚材攻木之司綴員宗寺

之班濫次弩坊之佐方謹依流之進忽叨守土之榮承  
乏是須偃躬莫避矧都梁之畫境實北鄙之要藩雖無  
城壁資固圉之雄所賴精神為折衝之本况貿遷有無  
欲阜通於商旅而還定安集在摩撫於人民倘非練達  
之才莫副倚毘之寄有如委瑣豈稱選掄茲蓋伏遇皇  
帝陛下離日方升乾綱獨運大明庶照自無遐遠之遺  
庶政內脩將底版圖之復要領異月氏之得繭絲期晉  
邑之能爰軫顧憂遂咨疇可庸示寸長之祿有光一郵

之行臣敢不俯竭愚衷仰酬隆施車云來北童謠已驗  
於輿情馬不牧南史筆載彰於盛世

房州到任謝表

汪德輪

分五符之守拜宸命以凌兢撫千里之封問遠民之疾  
苦具宣德意祇奉詔條臣

中謝

伏念臣初無已能濫延

世賞當高宗履艱難之運眷大父有陪扈之勞靖康帥  
府之肇開贊兵謀於北部建炎王業之再造迄佐命於  
南京帷幄頻年終始一節由先世効忠於夾日荷壽皇

軫念於凌烟猥及微蹤叨塵煩使昔兩試治中之任偶  
被荐揚今甫懷太守之章誤蒙推澤矧房陵之小壘介  
邊鎖之窮鄉舍邑稀疎殆若三家之市山蹊險阻甚於  
九折之涂舟車困而行旅弗道田畝狹而農夫告病頗  
為凋瘵正賴拊摩切自揆其庸愚殊未知於報塞茲蓋  
伏遇皇帝陛下天臨九有子視羣工用才各盡所長與  
人不求其備察臣久習為吏粗知守法之司謂臣或可  
承流俾膺郡國之寄臣敢不靖共乃職惟既厥心勉布

中和無間遐荒之域都捐愁嘆示均畿甸之民庶遐曠瘵  
少寬憂顧

衢州到任謝表

謝源明

上新安之計苟追謫訶分大末之符游塵差擇仰載君  
恩之重俯諧養親之私稱塞為難凌兢靡措臣中謝伏  
念臣性資窳陋學殖埋蕪朝暮蠶鹽叨世科之濫竊塵埃  
播楚甘俗吏之徒勞猥更治邑之繁誤玷監州之數方  
時攝守畢力拯飢困受察於中宸浸承流於偏壘奉十行

而宣布粗臻田里之安及再期而代還復覲冕旒之遽  
荷皇慈之曲造畀近郡以遣行若古四達之衢實今三  
輔之地舟車交湊雖名走集之衝冠蓋相望要是瑰奇  
之聚疇昔每除於法從比來至綴於宰司委倚之隆前  
後具見曷期品下亦在選中茲蓋伏遇皇帝陛下錫福  
寰區留神郡國嚴否臧而考察申黜陟以勸懲念臣已  
試之勞嘗叨列土謂臣方來之力尚足使令臣謹當恪  
意邵農平心聽訟五百里曰甸幸不違咫尺之威二千

石惟良倘自詭萬分之効誓圖報上敢憚捐軀

鄂州謝到任表

王齊興

久汙朝蹟未殫下走之勞旋錫州麾仍付上游之寄俶

裝而問川陸涓日以見吏民臣

中謝

伏念臣自起田廬

早游庠序沐高宗教養之久嘗與鄉書應紹興科目之

求乃膺官使自尉而今由倅以州入掌告身進聯書局

察器用之良窳知廩粟之盈虛乃丐外庸更叨煩使釋

耰鋤而漫仕幾三十年懷印章而迅征為二千石望長

安之遠日嘆鄂渚之緒風矧無故都乃今重地舟車輻  
輳聚商賈之貪廉貌虎雲屯處軍民之雜襲不有剗裁  
之具恐非牧御之長曾謂謝才可當除委茲蓋伏遇皇  
帝陛下子懷兆民器使羣工謂臣厯州縣之官偶無乏  
事知臣諳江湖之俗或可分憂雖么麼自揣其不堪而  
聖明欲令其姑試若為稱塞深積懼憂臣敢不仰體鴻  
私痛鞭駑下欲美化行江漢之域此豈由彈壓而能使  
庶幾民安田里之居尚有撫摩而已



肇慶府到任謝表

林次齡

剖懷澤之符誤玷三年之最瞻興慶之邸又叨再命之榮方觸組以懷歸廼移舟而就任冒恩不次揣已奚堪

臣

中謝

伏念臣仕無他長愚守幼學三鳴絃於十室之

邑或笑其迂兩分刺於十國之連公亦何補久乘一障未見寸功偶塵上考之書復畀潛藩之地倦飛知退姑圖遲次之少安推挽使前敢意後來之居上况累政久虛之後屬積年凋敝之餘非催科撫字兩得其宜則愁

恨嘆息莫安其所如臣寡用曷稱承流茲蓋伏遇皇帝  
陛下聖度并包皇明旁燭極海隅萬里之外曾不遐遺  
如才品一介之微亦分共理臣敢不究心宣布約已拊  
摩使此郡先王之遺民悉蒙遺澤凡古人循吏之治敢  
不存誠

瀘州到任謝表

王卿月

肅將隆旨甫拜明綸易畀左符亟承新渥念循牆而莫  
避豈出幕之敢辭揣分踰涯拊躬增惕臣中謝伏念臣

行能無取牧御非長三守塞垣迄無善狀再瞻天闕忽  
冒親除惟梓郡之輿區以瀘州為重鎮地控雲南之六  
詔疆連井絡之三邊雖烏言夷面久被於文明然狼子  
野心每虞於猾夏必羈縻之有道在震疊以先聲蓋德  
不足則難以服人智不周則艱於虞敵孔明心戰不專兵  
戰之勞德裕捍邊悉本籌邊之效得人為貴從古而然  
繫閫寄於非輕豈臣愚之所及茲蓋伏遇皇帝陛下曲  
成萬物器使羣工謂太醫以折臂為良嘗諸疾苦而割

劑匪養生之具或用膏粱致此孱庸亦預推澤臣敢不  
懷威是本明信自將不求赫赫之名自為身計第守  
平平之策庶答上恩

泉州到任謝表


鄭 丙

置散投閒將遂歸田之計攝官承乏遽叨乘障之行恩  
重丘山惴如淵谷臣中謝伏念臣稟資愚下從宦拙疎

扈從罔功誤玷承明之直守藩亡狀自干齊斧之誅仰  
賴恩私曲從寬貸畀之祠館終厥天年取永三百廛方

切素餐之愧起家二千石敢圖非分之榮矧是清源號  
為天府青衫筮仕昔依儉幕之蓮白首重來堪歎遼城  
之鶴井邑如舊耄艾半存在古人以為身府俱榮何今  
日乃至公私交急戎役供億帑藏一空夷獠錯居姦偽  
百出割股啗口至愈困其將若何剖斗折衡民不爭莫  
之能及非稟承於聖化曷布宣於藩條茲蓋伏遇皇  
帝陛下自誠而明惟睿作聖不泄邇而忘遠在知人而  
安民深軫此邦久闕正守送往迎來慮傷公賦匿瑕藏

疾就遣孤臣無待訓詞俾趨職守臣敢不飲冰聞命叱  
馭戒塗庶范孺袴之謠式勤今日子產田疇之咏或聽  
輿人



五百家播芳大全文粹卷五下